

Inatsisartut Suleriaasianni § 33, imm. 3, nr. 1 naapertorlugu Nunat Avannarliit Killiit Siunnersuisoqatigiiffianni Inatsisartut aallartitaasa siulittaasuata Josef Motzfeldtip aalajangiiffigisassatut siunnersuut manna saqqummiuppaa:

Nunat Avannarliit Killiit Siunnersuisoqatigiiffiata kaammattuutit aalajangersagaanik nr. 4/2011-mik, ataani allassimatut oqaasertalimmik, Inatsisartut tapersiinissaannik Inatsisartut aalajangiiffigisassaattut siunnersuut:

**Nunat Avannarliit Killiit Siunnersuisoqatigiiffiata Islandimi, Savalimmiuni Kalaallilu Nunaanni naalackersuisut kaammattorpaat Kalaallit Nunaanni, Islandimi Savalimmiunilu oqartussat susasaqartut suleqatigalugit eqqakkat atoqqinneqarsinnaasut qanoq pineqartarnerat eqqarsaatigalugu nunat pineqartut ataatsimut soqutigisaat nalunaarsoqqullugit, taamatullu aamma nunani pineqartuni eqqakkat atoqqinneqarsinnaasut qanoq pineqartarnerat pillugu nunat avannarliit killiit siunnersuisoqatigiiffiannut killiffimmik nalunaarusioqqullugit.**

Tungavilersuut:

Nunat Avannarliit Killiit ilisarnaataasa ilagaat qeqertaagamik, taamaattumillu eqqakkat atoqqinneqarsinnaasut qanoq pineqarsinnaanerannut taakku pisiarinearlutik sumiiffinnut suliareqqinneqarfigisinnaasaannut imaatigut assartorneqarsinnaanissaat aalajangiisuusorujussuulluni.

Nunani avannarlerni killerni eqqakkanik atoqqinneqarsinnaasunik pisinissamik tuniniaanissamilluunniit kissaateqartunut soqutiginnittunut periarfissat qulaajarniarlugit suliassaqrarfiup tamatuma nunani pineqartuni qanoq aqunneqarnerata paaseqqissaarneqarnissaa pisariaqarpoq.

Naalackersuisut kaammattorneqarput eqqakkat atoqqinneqarsinnaasut katersorneqartarnerat eqqarsaatigalugu ataatsimut periusioqqullugit, minnerunngitsumik taakku assartorneqarnissaannut periarfissat eqqarsaatigalugit.

Eqqakkat atoqqinneqarsinnaasut qanoq pineqartarnerat eqqarsaatigalugu qaangerniagassat ajornartorsiutaasinnaasullu pillugit misilittakkanik paasissutissanillu paarlaasseqatigiinnissaat naalackersuisunut kaammattuutigineqarpoq, taamaaliornikkut nunani pingasuni tamani eqqakkanik katersuisarnermik, atoqqinneqarsinnaasunillu atueqqiinikkut, aningaasatigut akilersinnaasumik avatangiisinullu iluaqutaasumik pilersitsiartuaartoqarsinnaaniassammat.

Inuiaqatigiinni nutaaliaasuni eqqagassalerinermut nalinginnaasumik piumasaqaataasut pisuussutillu atoqqinneqarsinnaasut atoqqinneqarsinnaanissaasa qularnaarneqarnissaat eqqarsaatigalugit pisariaqarpoq tamatuminna soqutigisaqarsinnaasut ingerlatserusuttullu nunani pingasuni eqqagassat atoqqinneqarsinnaasut qanoq pineqartarnerannik ingerlaannaq ataatsimut paasisaqarsinnaanissaat. Nunat Avannarliit Killiit Siunnersuisoqatigiiffiat isumaqarpoq suliassaqrarfiimi ataatsimut killiffimmik nalunaarusiortoqarneratigut suliffeqarfiit suliassaqrarfiup iluani ingerlataqartut ajornannginnerusumik soqutiginnilersinneqarsinnaasut nunani avannarlerni killerni eqqagassalerinermi inuussutissarsiornermik ineriartortitsinermi annertuumik ingerlataqarsinnaanerup iluaqutissartaasa qulaajarneqarnissaannut.

Nunat avannarliit killiit eqqagassalerinermik siunissamut isumannaakkamik pisariaqartitsipput taamaattumillu Nunat Avannarliit Killiit Siunnersuisoqatigiiffiat isumaqarluni aalajangiisuulluinnassasoq suliassaqarfimmi misilittakkanik katersuisoqarnissaa taamaalilluni aamma suliffeqarfiit suliassaqarfimmi ingerlataqartut periarfissaminnik sukumiinerusumik paasisaqarniassammata, taamatullu aamma eqqagassalerinermik periaatsimut akilersinnaasumut peqataanissaminnut nunat pineqartut qularnaariffigineqarniassammata.